



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 15. 2018

Riesgo di Invershon i e Importansha di Diversifikashon

Parti 1

“E riesgo di mas grandi ta pa no tuma niun riesgo.”

Mark Zuckerberg

Kiko bo ta komprondé ora bo tende di diversifikashon di riesgo? “E ta zona manera un terminologia grandi ku profeshonalnan di invershon ta plama pa nan zona i parse sabí!” - un di mi amigunan a kontestá ora mi a puntr’é. Kiko bo ta kere e ta? Ta algu ku bo por djis splika un amigu òf un miembro di bo famia? Mi tin sigur ku lo bo por rei e nifikashon di kada un di e términonan individual. I mi ta konfia ku un hende por splika òf sikiera duna ehèmpel di bida real kiko riesgo ke men pa nan i tambe kiko diversifikashon òf kualke un di e palabranan derivá di dje (diversifiká, diverso) ke men. Pero pone e palabranan huntu anto - puf!. Ayó kompreshon! Wèl, awe mi ke invitá bo bèk den e kòmbersashon miéntas ku mi ta investigá diversifikashon di riesgo i e papel krítiko ku e ta hunga den invershon. Na mi opinion diversifikashon di riesgo ta un di e konseptonan di mas importante den invershon ku tur invershonista mester komprondé!

Ke men si bo ke bira serio tokante invershon, òf si bo ke djis kuminsá siña mas tokante kon drenta den invershon, esaki ta un konsepto ku bo mester sa! Djòin mi, laga mi kompartí ku bo. Nos lo tuma paso chikitu, laga nos trata kada palabra riba su mes i e ora ei nos lo eksplorá su importansha.

Kiko bo ta pensa ora bo pensa riba riesgo? Si bo ta kanando den un kaya yen di hende i tráfiiko, maske kuantu kuidou bo tin, semper tin e posibilidat ku un outo por sali di unda ku ta i dal bo. E posibilidat ku un vehíkulo ta dal bo den e kaso aki ta e riesgo. P’esei, riesgo ta simplemente e chèns ku algu desfavorabel lo sosodé.

Den e mundu di invershon, e meta pa un invershonista ta pa gana mas tantu plaka posibel ku e plaka inisial ku e ta invertí. P'esei algu faborabel lo inkluí ku e invershonista ta alkansá un rendementu òf un ganashi masha haltu. Miéntras ku algu desfavorabel lo ta pa no gana nada òf pió, pèrdè parti di, òf den algun kaso tur, e plaka inisial ku e invershonista a invertí originalmente. Ke men, si nos papia tokante riesgo den e área di invershon, nos ta referí na e chèns ku e invershonista no ta gana plaka òf e chèns ku e invershonista ta gana ménos ku e tabata ke òf spera, òf asta pió, e posibilidat ku e invershonista ta pèrdè asta e plaka ku el a invertí originalmente.

Mas haltu e chèns di e evento desfavorabel - gana ménos ku bo tabata ke - mas haltu nos ta bisa ku e riesgo di invershon ta. Laga nos bai bèk na nos ehèmpel di den mundu di realidat. E posibilidat - òf e riesgo ku un outo por dal bo i heridá bo seriamente por ta haltu òf abou, i ta dependé di kon bon bo ta krusa kaya, no ta bèrdè? Den un instansha, si bo a usa e krusamentu di peaton, bo a wak pa mira si tin outo ta bini, bo a warda pa e shofùrnán di e outonan mustra ku nan a mira bo anto e ora ei numa bo ta krusa solamente si e shofùrnán di e outonan a para pa laga bo pasa - e ora ei e riesgo ku un outo ta dal bo ta signifkantemente abou. Pero kiko ta pasa si bo a kore subi e mésun kaya hopi drùk, sin wak si sigur no tin outo ta bini den bo direkshon? E riesgo ku outo ta dal bo i ku bo ta sufri herida serio ta muchu mas haltu! Meskos, tin invershon ku riesgo masha haltu, pasobra e invershon lo eksponé e invershonista na un posibilidat mas grandi di pèrdè su plaka inisial ku el a invertí.

Awor ku bo tin un bon kompreshon di riesgo, djòin mi pa e próksimo publikashon kaminda nos ta añaadí diversifikashon i profundisá mas leu den kompreshon real di e importansha di diversifikashon di riesgo den invershon.

Sigui Skina di Invershonista pa tur kos ku bo mester sa tokante Kreashon di Rikesa!

E editorial aki a wòrdu presentá na bo pa e DCSX ku kolaborashon di Vertex Investments.

Outor di e publikashon aki: Stephanie Shaw CFA, MBA.

